

# LATOUR VEYER

PE ANONS RWAYONM ZEOVA

Eski i annan  
en lavi  
apre sa enn?



# KONTENI

- 3 Soufrans ki lanmor i anmennen
- 4 Resers lo konman pour viv pli lontan
- 6 Nou'n ganny kree pour viv pour touzour
- 8 Akoz nou vin vye e mor?
- 10 Ki manner lanmor pou disparet?
- 12 Ki manner ou kapab annan en pli bon lavi?
- 14 I posib pour nou ere ozordi
- 16 Ki lespwar i annan pour bann mor?

**LATOUR VEYER®**  
PE ANONS RWAYONM ZEOVA

Vol. 140, No. 11 2019 SEYCHELLES CREOLE  
Kantite enprimen pour sak nimerò: 83,449,000  
Disponib dan 353 LANGAZ

SA MAGAZIN, *Latour Veyer*, i onor Zeova Bondye konman Dirizan dan liniver. I rekonfort dimoun avek sa bon nouvel lo Rwayonm Bondye ki pou byento met en lafen avek tou mesanste e fer later vin en paradi. I promot lafwa dan Zezi, ki ti mor pour ki nou kapab ganny lavi eternel e ki pe dirize konman Lerwa dan Rwayonm Bondye. Sa magazin in ganny bibliye kontinyelman depi 1879 e i pa angaz dan okenn politik. I respekte Labib konman son lotorite.

*The Watchtower* (ISSN 0043-1087)  
September/October 2019.  
© 2019 Watch Tower Bible and Tract Society of Pennsylvania.  
Printed in Germany.  
© Druck und Verlag: Wachturm Bibel- und Traktat-Gesellschaft, Selters/Ts., V. i. S. d. P. Manfred Steffensdorfer, Selters/Ts.

Pour LAFRANS:  
Association Les Témoins de Jéhovah  
BP 625  
F-27406 Louviers Cedex

Pour GRANNBRETANNY:  
Jehovah's Witnesses  
The Ridgeway  
London NW7 1RN

Ladres bann diferan pei i lo  
[www.jw.org/en/contact](http://www.jw.org/en/contact).



Eski ou ti a kontan resevwar plis lenformasyon oubyen en letid Labib gratwit?

Al lo [www.jw.org](http://www.jw.org),

oubyen anvoy ou demann lo enn sa bann ladres.

Nou pa vann sa magazin. I ganny servi dan sa travay mondyal pour ansenny dimoun lo Labib e i ganny soutenir par kontribisyon volonter.

Si ou ti a kontan fer en donasyon, al lo [donate.jw.org](http://donate.jw.org). Eksepte kan i endike, bann sitasyon Lekritir Grek in ganny tire dan *Labib—Matye-Revelasyon*—Tradiksyon nouvo lemonn. Bann referans dan Lekritir Ebre in ganny tire dan *Labib an Kreol Seselwa*. Kan NWT i swiv en sitasyon, sa i endike ki sa verse in ganny tradwir apartir *New World Translation of the Holy Scriptures* an Angle.

# SOUFRANS KI LANMOR I ANMENNEN



IMAZIN ou pe get en video lo en dimoun popiler, petet en mizisyen renonmen ki ou admire. I konmans par montre li ler i ti ankor zenn pe aprann zwe en lenstriman lanmizik e plizyer fwa kot i ti pe *practice*. Apre sa, ou vwar li pe fer bann spektak partou dan lemonn e i vin en dimoun popiler. Pa bokou letan apre, ou vwar li konmans vin vye e lo finisyon sa video, i mor.

Sa video i en vre zistwar lo en dimoun ki ti vreman egziste e ki'n mor. Ki swa sa dimoun ti en mizisyen, en syantis, en atlet ouswa en nenport ki dimoun popiler, sa zistwar ti pou parey. I kapab ki sa dimoun in fer en kantite bon keksoz me mazin lo sa kantite keksoz ki i ti'n kapab fer si i pa ti'n vye e mor?

Malrezman, sanmenm ki pou arive avek nou tou. (Eklezyast 9:5) Menm si nou fer tou sa ki nou kapab pou anpes nou vin vye e mor, nou pa resi. Pa zis sa, nou kapab perdi nou lavi en sel kou dan en aksidan oubyen avek en maladi. Parey i dir dan Labib, nou parey lafoumbal dan bomaten ki “apa-

ret pour en pti pe letan e apre i disparet.”—Zak 4:14.

Vi ki nenport ler nou kapab mor, serten i dir “annou manze e bwar, parski demen nou pou mor.” (1 Korentyen 15:32) Me dimoun i viv koumsa parski zot konnen ki zot kapab mor nenport ler e zot napa lespwar pour lavenir. A en serten moman dan lavi, sirtou ler en dimoun pe pas dan difikilte, i kapab mazin, ‘Eski i annan en lavi apre sa enn?’ Kote ou kapab ganny larepons?

En kantite dimoun i krwar ki bann syantis i kapab trouv larepons. Bann syantis ek dokter in trouv bann keksoz ki fer li posib pour ogmant la-kantite letan ki nou viv. Serten syantis pe menm rod fason pour fer ki nou viv pli lontan posib. Ki swa sa bann syantis i reisi oubyen non, kestyon i: Akoz nou vin vye e mor? Eski i annan lespwar ki lanmor pou disparet en zour? Sa lartik ki swiv pou koz lo sa bann topik e i reponn sa kestyon: ‘Eski i annan en lavi apre sa enn?’

# RESERS LO KONMAN POUR VIV PLI LONTAN

“Monn vwar travay ki Bondye in donn garson zonn pour kit zot okipe. I’n fer tou keksoz zoli dan son letan apropiye. I’n menm met dezir pour viv pour touzour dan zot leker.”—Eklezyast 3:10, 11, NWT.

SA BANN parol ki Lerwa Salomon, en lerwa byen saz ti dir i dekri ki mannyer imen i santi. Pour pli-zyer lannen, imen in toultan anvi rod en solisyon pour anpes zot mor vi ki lavi i kourt e nou pa kapab evit lanmor. I’n annan bokou zistwar ek lezann lo bann dimoun ki’n esey rod en fason pour ki nou kapab viv pli lontan.

Pran par egzanp Gilgamesh, ki ti lerwa Sumer. I annan bokou lezann ki ganny rakonte lo li. Enn sa bann lezann ki dan *Epic of Gilgamesh* i dir ki i ti fer en vwayaz danzere pour aprann ki mannyer i kapab pa mor. Me i pa ti reisi aprann ki mannyer pour fer sa.

Dan katriyenm syek, bann syantis Lasin ti esey fer en latizann ki dapre zot ti pou fer zot viv pli lontan. Sa latizann ti en melanz ki ti annan en pti gin merkir ki toksik e i tre probab i sa latizann ki ti touy serten bann lanperer Sinwan. Dan bann lannen 500 ek 1500, serten syantis Lerop ti esey fer fonn lor pour ki imen i kapab dizer li. Zot ti mazin, si lor pa kapab ganny detri alor i kapab fer dimoun viv pli kontan.

Ozordi osi serten syantis pe esey rode aköz dimoun i vin vye. Zot resers i montre ki dimoun i ankor anvi kontinyen viv e zot pa anvi vye e mor. Me eski sa bann resers in ede?

## RESERS LO AKOZ NOU VIN VYE

Bann syantis ki etidye selil imen i donn plis ki 300 diferan leksplikasyon lo aköz nou vye e mor. Resaman bann syantis in reisi modifye sa bann *genes* ek protein pour fer selil bann zannimo ek imen



© Chronicle/Alamy Stock Photo

En syantis  
dan son laboratwar

viv pli lontan. Sa in fer serten dimoun popiler donn larzan bann syantis pour rode aköz nou mor. Me ki zot in fer?

**Lesey pour fer dimoun viv pli lontan.** Serten syantis i krwar ki nou vin vye e mor aköz sa ki ari-ve avek bann *telomeres* ki trouve dan bout bann *chromosomes*. *Telomeres* i protez bann lenformasyon zenetik ki dan nou bann selil anmezir zot divize. Me sak fwa bann selil i divize, *telomeres* i diminyen. Avek letan sa bann selil i aret divize e la nou konmans vye.



Eski ler bann syantis i modifye bann *genes*,  
sa i fer imen viv pli lontan?

Elizabeth Blackburn ki ti ganyan pri nobel an 2009, ansanm avek son lekip, ti idantifye sa sibstans ki retard prosesis kot bann *telomeres* i diminyen e sa i anpes sa selil vin vye. Par kont, zot resers i montre ki *telomeres* pa fer nou viv pli lontan.

**Sanz lenformasyon dan bann selil** i en lot fason pour esey anpes nou vin vye. Ler nou selil i vin tro vye pour divize, zot kapab anvoy en move sinyal kot bann lezot selil ki lager kont bann lenfeksyon e sa i fer en dimoun ganny lanflanmasyon, douler ek maladi. Resaman, bann syantis Lafrans in sanz lenformasyon bann selil ki zot in pran dan bann dimoun aze e serten sa bann dimoun ti annan plis ki 100 an. Profeser Jean-Marc Lemaître, sa enn ki ti okip sa resers ti dir ki zot travay i demontre ki zot kapab anpes dimoun vin vye.

## ESKI LASYANS I KAPAB FER NOU VIV PLI LONTAN?

En kantite syantis i dir ki menm si i annan bokou tretman pour anpes dimoun vye, imen pa pou reisi viv pli lontan ki zot deza pe viv. I vre ki kantite letan ki dimoun i viv in ogmante depi diznyenn syek. Me sa i akoz konmela i annan pli bon lizyenn, bann latizann ki anpes dimoun malad ek lezot latizann ki geri diferan kalite maladi. Serten syantis i krwar ki sa kantite letan ki dimoun i viv in ariv lo son limit.

Apepre 3,500 lannen pase, Moiz, en ekriven Labib ti dir: “Nou lavi i dir zis pour 70 an, parfwa 80 an pour bann ki pli for; me nou konn zis traka ek lapenn; zot pas vit e nou anvole.” (Psonm 90:10) Malgre tou zefor ki zonm pe fer pou viv pli lontan, lakantite lannen ki dimoun i viv i reste parey sa ki Moiz in dir.

De lot kote, bann keksoz ki Bondye in kree tel parey lantannyan rouz oubyen en kalite palourd ki apel quahog clam, i kapab viv plis ki 200 an e bann gro pye dibwa parey pye sequoia i kapab viv plis ki mil an. Ler nou konpar nou lavi avek sa bann keksoz, sa i kapab fer nou demande, ‘Eski nou sipoze viv zis pour 70 oubyen 80 an?’

---

## BONDYE IN “MENM MET DEZIR POUR VIV POUR TOUZOUR DAN ZOT LEKER.”

—EKLEZYAST 3:10, 11, NWT



# NOU'N GANNY KREE POUR VIV POUR TOUZOUR

LEKEL parmi nou ki pa anvè viv lontan e ere? Zis mazinèn ki manyèr lavi ti pou gou si nou ti kapab viv ere e an bonn sante! Nou ti pou kapab pas plis letan avèk bann dimoun ki nou kontan, fer letour lemonn e aprann fer bann keksoz ki nou kontan.



Pa ti pou gou viv koumsa! Me akòz dimoun i anvè viv pour touzour? Labib i dir ki Bondye in met sa dezir dan nou leker. (Eklezyast 3:11, *NWT*) Labib i osi dir ki “Bondye i lanmour.” (1 Zan 4:8) Bondye i kontan nou e i pa ti pou’n kree nou avèk sa dezir pour viv pour touzour si nou pa pou zanmen kapab viv pour touzour.

I kler ki personn pa anvè mor. Anfet, Labib i dekri lanmor konman en “lennmi.” (1 Korentyen 15:26) Serten dimoun i mor zenn, lezot i viv pli lontan me nou tou nou pou mor en zour. Bokou dimoun i per ler zot mazin lanmor. Eski lanmor pou disparet en zour? Eski sa i vreman posib?

## FASON KI NOU'N GANNY KREE I DONN LESPWAR

Eski i sirprann ou ki i pa ti zanmen plan Bondye pour imen mor? Dan Labib, liv Zenez i montre ki i ti plan Bondye pour imen viv pour touzour lo later. Zeova ti kree later ek tou sa ki neser pour imen viv en lavi ere. I ti kree sa premye zonn, Adan e met li dan zarden Edenn ki ti en paradi. Apre sa “Bondye ti regard tou sa ki i ti’n fer; tou ti tre bon.”—Zenez 1:26, 31.

Bondye ti kree Adan parfe. (Deterononm 32:4) Ev, madanm Adan osi ti parfe mantalman e fizik-

man. Zeova ti dir avek zot: “Zot ava fer zanfan, zot ava ogmante e ranpli later; zot ava soumet anba zot dominasyon, tou pwason dan lanmer, tou zwazo dan lesyel ek tou zannimo ki bouze lo later!”—Zenez 1:28.

I ti pou pran letan pour zot ranpli later avek zot desandans. Ev ti pou fer zanfan e sa bann zanfan ti pou fer zanfan ziska ki later i ranpli parey Bondye ti anvi o konmansman. (Izai 45:18) Eski i rezonnab pour krwar ki Zeova ti pou ofer Adan ek Ev sa posibilite, si zot ti sipoze viv en serten letan zis pour zot vwar zot zanfan ek petet pti zanfan e apre zot pa konnen ki pou arive?

Pa zis sa, mazin sa travay ki Bondye ti’n donn zot pour domin lo bann zannimo! Adan ti ganny demande pour donn non bann zannimo e sa ti pou pran letan. (Zenez 2:19) Me pour domin lo zot ti pou vedit ki Adan ti pou bezwen aprann plis lo bann zannimo e konpran ki mannyer pour pran swen avek zot. Sa ti pou pran bokou plis letan ki donn non zannimo.

Alor, sa lord ki Bondye ti donn zot pour ranpli later e domin lo bann zannimo i montre ki sa premye koup ti’n ganny kree pour viv lontan. Anfet, i vre ki Adan ti viv pour bokou letan.

## ZOT TI VIV POUR BOKOU LETAN

Labib i montre ki imen in deza viv bokou plis letan ki nou ozordi. Labib i dir: “Adan ti viv an tou 930 an.” Apre i mansyonn sis lezot zonnm ki ti viv plis ki 900 an. Sa ti Set, Enos, Kenann, Zared, Metousela, Noe. Zot tou zot ti viv avan Deliz dan letan Noe e Noe ti viv pour 600 an avan Deliz. (Zenez 5:5-27; 7:6; 9:29) Ki mannyer zot ti kapab viv tou sa letan?

Sa bann zonnm ti viv pli pros avek perfeksyon. I tre probab i pour sa rezon ki zot ti kapab viv lontan. Me ki mannyer perfeksyon i annan en lefe lo lakantite letan ki ou viv? Ki mannyer lanmor pou disparet? Pour trouv larepons, premyerman nou bezwen konpran aköz nou vye e mor.

## PLAN BONDYE I POUR IMEN VIV POUR TOUZOUR DAN EN PARADI LO LATER



| Adan 930 an



| Metousela 969 an



| Noe 950 an



| Ozordi 70-80 an

---

# AKOZ NOU VIN VYE E MOR?

I PA ti dan plan Bondye pour imen mor. Nou premye paran, Adan ek Ev ti ganny kree parfe mantalman, fizikman e i kapab ki zot ti pou ankor vivan ozordi. Zeova ti fer sa kler dan sa ki i ti dir avek Adan konsernan en kalite pye dibwa ki ti pous dan zarden Edenn.

Bondye ti dir Adan: “Zour ki ou manz sa fri, ou pou mor.” (Zenez 2:17) Si Bondye ti’n kree Adan pour vin vye e mor, i ti pou napa rezon pour donn li sa lord. Adan ti konnen ki si i pa manz sa fri i pa ti pou mor.

Adan ek Ev pa ti bezwen manz sa fri pour reste vivan vi ki zarden ti ranpli avek en kantite pye dibwa ki raport lezot fri. (Zenez 2:9) Si zot pa ti’n manz sa fri, zot ti pou’n demontre zot lobeisans anver sa Enn ki’n donn zot lavi. Sa ti pou’n osi montre ki zot rekonnèt drwa Bondye pour dir zot ki pour fer.

## AKOZ ADAN EK EV TI MOR?

Pour konpran aköz Adan ek Ev ti mor, nou bezwen egzamin en konversasyon ki’n annan en lefe lo nou tou. Satan ti servi en serpan pour koz mansonz pour fer ditor. Sa resi Labib i dir: “Serpan ti pli rize parmi tou bann zannimo sovaz ki [Zeova] Bondye ti’n kree. I ti demann sa fanm, ‘Eski Bondye in vreman dir: Ou pa devre manz tou bann fri lo bann pye ki dan zarden?’”—Zenez 3:1.

Alor Ev ti reponn: “Nou kapab manz bann fri lo bann pye ki dan zarden. Me kanta fri sa pye dibwa ki dan milye zarden, Bondye in dir: Pa manz li, pa ni tous li, sankwa ou pou mor.” Serpan ti dir sa fanm: “Zot pa pou mor. Bondye i konnen ki letan zot pou manz sa fri, zot lizye pou ouver, zot pou vin parey Bondye, e zot pou konn lebyen ek

---

**Bondye ti dir Adan:**  
**“Zour ki ou manz sa fri,  
ou pou mor.”**

—ZENEZ 2:17

---

lemal.” Satan ti pe esey dir ki Zeova i en manter ki pa ti anvi Adan ek Ev ganny en bon keksoz. —Zenez 3:2-5.

Ev ti krwar sa ki i ti tandé. I ti get byen sa pye dibwa e ti vwar sa fri sitan atiran ki i ti anvoy son lanmen, pran enn sa fri e konmans manzé. Labib i dir: “I ti donn osi en morso son mari” kan i ti avek li e i ti konmans manzé.—Zenez 3:6.

Bondye ti’n bezwen sagren pour vwar son bann zanfan ki i ti kontan, dezobei li volonterman! Ki i ti fer? I ti dir Adan: “Ou pou . . . retourn dan lapousyè, kot ou sorti. Annefe, ou’n ganny tire dan lapousyè, ou pou retourn dan lapousyè.” (Zenez 3:17-19) Vi ki Adan ti dezobei, i “ti viv antou 930 an e apre i ti mor.” (Zenez 5:5) Adan pa ti al dan lesyel oubyen kontinyen viv en lot landrwa. I pa ti egziste avan ki Zeova ti kree li avek lapousyè. Alor ler i ti mor, i ti nepli vivan zis parey lapousyè ki i ti’n ganny fer avek. I ti aret egziste. Pa sa i vreman tris!





### **AKOZ NOU PA PARFE?**

Vi ki Adan ek Ev ti dezobei Bondye volonterman, zot ti perdi zot lavi parfe ek sa lespwar pour viv pour touzour. Me Adan ek Ev ti dezobei e zot pese pa ti afekte zis zot tousel. Zot ti konmans sanze fizikman, zot ti vin enparfe akoz pese e tou zot desandans in erit pese. Romen 5:12 i dir: “Atraver en sel zonm [Adan] pese in antre dan le-monn e pese in anmenn lanmor, alor tou dimoun i mor parski tou dimoun in fer pese.”

Labib i dekri pese ek lanmor konman “sa vwal dey ki pe kouver tou bann pep, sa dra ki’n kouver tou bann nasyon.” (Izai 25:7) Sa vwal pe kouver limanite parey en ler anpwazonnen e napa fason sove. I vre ki “tou i mor dan Adan.” (1 Korentyen 15:22) Sa i fer nou demann menm kestyon ki Pol ti demande: “Lekel ki pou delivre mwan avek sa lekor ki pe touy mwan?” Eski i annan enn ki kapab delivre mwan?—Romen 7:24.

---

## **I PA TI PLAN BONDYE POUR BANN IMEN MOR**

# KI MANNYER LANMOR POU DISPARET?

Menm si Adan ek Ev ti dezobei e zot in anmenn lanmor lo tou limanite, sa pa'n sanz plan Bondye pour bann imen. Dan son parol Labib, plizyer fwa Bondye in montre ki son plan pa'n sanze.

- “Bann dimoun drwat pou ganny donner later e zot pou reste lo la pour touzour.”  
—Psonm 37:29, NWT.
- “La sa ki [Zeova] i promet: Lanmor pou disparet pour touzour. Senyer Bondye pou eswiy tou larm lo tou bann figir.”  
—Izai 25:8.
- “Dernyen lennmi, lanmor, pou ganny detrir.”—1 Korentyen 15:26.
- “I pou nepli annan ni lanmor, ni dey, ni leokri, ni douler ankor.”  
—Revelasyon 21:4.

Ki mannyer Bondye pou fer ‘lanmor disparet’? Parey nou’n vwar, Labib i dir: “Bann dimoun drwat . . . pou reste pour touzour.” Me i osi dir ki “lo later, napa en sel zis, ki fer zis sa ki byen san komet en pese.” (Eklezyast 7:20) Eski sa i vedir ki Bondye pou bes son bann standar pour ki bann imen enparfe ki fer pese i kapab viv pour touzour? Ditou. I pa pou zanmen fer sa, parski “Bondye . . . pa kapab koz manti.” (Tit 1:2) Me ki Bondye pou fer pour akonplir son zoli plan ki i ti annan ler i ti kree imen?

## RANSON IN GANNY PEYE POUR FER LANMOR DISPARET

Zeova in fer en zoli laranzman pour liber limanite dan lanmor par pey en ranson. Ranson i sa pri ki kouver lavalè sa ki'n ganny perdi pour fer ki i

annan lazistis. Vi ki tou imen i fer pese e in ganny santans lanmor, Labib i dir: “Personn pa kapab reaste lavi, ni pey Bondye en ranson pour li, (sa ranson i sitan annan en gran valer ki zot pa pou kapab peye).”—Psonm 49:7, 8.


Ler en imen enparfe i mor, i zis kapab pey konsekans son pese, i pa kapab liber son lekor ni menm pey pese son kanmarad. (Romen 6:7) Nou ti bezwen en dimoun parfe e san pese pour ofer son lavi pour nou pese.—Ebre 10:1-4.

Sa i egzakteman sa ki Bondye ti'n mazin fer. I ti anvoy son Garson, Zezi, sorti dan lesyel pour ne lo later konman en imen parfe. (1 Pyer 2:22) Zezi ti dir ki i'n vin “donn son lavi konman en ranson pour liber bokou dimoun.” (Mark 10:45) I ti mor pour pey nou pese e liber nou avek lanmor.—Zan 3:16.

## KAN KI LANMOR POU DISPARET?

Anmezir bann profesè Labib pe ganny akonplir ozordi, nou pe viv “en letan vremen difisil” ki montre nou dan “bann dernyen zour” sa move lemonn. (2 Timote 3:1) Bann dernyen zour pou fini ler “bann dimoun dezobeisan pou ganny detrir.” (2 Pyer 3:3, 7) Me bann dimoun ki kontan Bondye pour sirviv sa destriksyon e pou ganny beni par ganny “lavi eternal.”—Matye 25:46.

Plizyer milyon dimoun i osi annan sa loportinite pour ganny lavi eternal ler zot pou ganny resite. Ler Zezi ti vizit lavil Nain, “son leker ti fermal” ler i ti vwar ki sel garson en vev ti'n mor e sa ti pous li pour resisit sa garson. (Lik 7:11-15) Zapot Pol osi ti dir: “Mon annan konfyans dan Bondye . . . ki dimoun bon konman move pou resite.” Sa lespwar ki Bondye in donn nou i demontre son gran lanmour ki i annan pour limanite.—Akt 24:15.



Plizyer bilyon dimoun i kapab esper avek enpa-syans pour viv pour touzour. Labib i dir: “Bann dimoun drwat pou ganny donner later e zot pou reste lo la pour touzour.” (Psonm 37:29, NWT) Sa letan, zot pou byen kontan e santi zot ankouraze pour eksperyans lakonplisman sa ki zapot Pol ti ekri apepre 2000 an pase: “Lanmor, oli ou lavik-twar? Lanmor, oli ou dart?” (1 Korentyen 15:55) Lanmor, lenmi limanite pou’n disparet!



---

**BONDYE I PROMET KI  
“LANMOR POU DISPARET  
POUR TOUZOUR.”**

**—IZAI 25:8**

Zezi ti vin “donn son lavi konman en ranson pour liber bokou dimoun.”—Mark 10:45

# KI MANNYER OU KAPAB ANNAN EN PLI BON LAVI?

LAFASON ki imen i viv ozordi i diferan avek lafason ki Bondye ti anvi. Later ti'n devret ranpli avek dimoun ki respekte drwa Bondye pour dirize, ki ganny bann byenfe avek son gidans e ki imit son lanmour ek lezot son bann zoli kalite. Bondye ti anvi dimoun viv ere ansanm anmezir ki zot fer zot prop fanmir, dekouver nouvo keksoz e fer later antye vin en paradi.

## BONDYE I PROMET POUR FER LAVI LO LATER VIN PAREY I TI OULE

- “I fer lager arete partou lo later.”  
—Psonm 46:9.
- “Letan fikse ti arive . . . pour detri bann ki pe detri later.”  
—Revelasyon 11:18.
- “Personn pa pou dir: Mon malad!”  
—Izai 33:24.
- “Sa bann ki mon'n swazir, pou profit travay ki zot in fer par zot lanmen.”  
—Izai 65:22.

Ki manner sa bann profes i pou ganny akonplir? Bondye in apwent son Garson, Zezi konman Lerwa dan en gouvènmant parfe dan lesyel pou diriz later. Labib i apel sa, Rwayonm Bondye. (Danyel 2:44) Labib i dir sa lo Zezi: “Bondye Zeova pou donn li tron . . . I pou [vin] Lerwa.”—Lik 1:32, 33.

Ler Zezi ti lo later, i ti fer en kantite mirak pour montre ki ler i pou dirize konman Lerwa, i pou fer bann imen annan en pli bon lavi ki nou annan la konmela.

## ZEZI TI MONTRE BANN BON KEKSOZ KI I POU FER POUR BANN IMEN OBEISAN

- I ti geri dimoun ki ti annan tou sort maladi pour montre ki manner i pou elimin tou sort problem lasante ki pe afekte limanite.—Matye 9:35.
- I ti fer lanmer vin kalm pour montre ki manner i pou protez bann dimoun par kontrol lafors lanatir.—Mark 4:36-39.
- I ti nourri plizyer milye dimoun pour montre ki manner i pou donn dimoun zot nesosite dan lavi.—Mark 6:41-44.
- I ti fer delo vin diven pour prouve ki i pou ed dimoun rezoui lavi.—Zan 2:7-11.

Ki manner ou kapab ganny sa lavi ki Bondye in anmas pour bann ki kontan li? Ou bezwen swiv en “semen.” Labib i dir ki ou devret rod “sa semen . . . ki anmenn ver lavi, me pa bokou ki pe trouv li.”—Matye 7:14.

## ROD SA SEMEN KI ANMENN VER EN MEYER LAVI

Lekel sa semen ki anmenn ver lavi? Bondye i dir: “Mwan [Zeova], ou Bondye. Mon ansenny ou pour ou prop dibyen; mon kondwir ou lo semen ki ou devre swiv.” (Izai 48:17) Si ou mars lo sa semen ou pou annan en meyer lavi.

Zezi ti dir: “Mwan menm semen, laverite ek lavi.” (Zan 14:6) Si nou fer sa ki Zezi i dir e imit son legzanp, nou pou vin pli pros avek Bondye e nou pou annan en meyer lavi.





Kreater e vin son zanmi. Nou kapab montre ki nou kontan li par fer son lavolonte. Zezi ti dir: “Savedir, pour ganny lavi eternel, zot bezwen aprann konn ou, sa sel vre Bondye.”—Zan 17:3.

### FER SA PREMYE PA

Ler nou konn sa ki sa sel vre Bondye i anvi nou fer, petet nou pou bezwen fer bann sanzman. Sa i paret difisil. Me an realite, i en vwayaz enteresan ler nou konmans fer sa premye pa pour mars lo semen lavi. Pour ed ou ganny larepons bann kestyon lo Bondye, Temwen Zeova i ofer ou en letid Labib gratwit dan en ler ek landrwa ki pli konvenab pour ou. Ou kapab kontakte nou lo sit Enternet [www.jw.org](http://www.jw.org).

**Ki mannyer ou kapab trouv semen lavi?** I annan en kantite larelizyon, me Zezi ti donn sa laver-tisman: “Pa tou dimoun ki dir mwan, ‘Senyer, Senyer,’ ki pou antre dan Rwayonm lesyel, me zis sa enn ki pe fer lavolonte mon Papa ki dan lesyel ki pou antre.” (Matye 7:21) I ti osi dir: “Zot pou rekonnèt sa bann dimoun par zot fri.” (Matye 7:16) Labib i kapab ed ou konn sa vre larelizyon.—Zan 17:17.

**Ki mannyer ou kapab swiv semen lavi?** Ou pou bezwen aprann konn sa personnaz ki’n donn tou dimoun lavi: Lekel li? Ki mannyer i apele? Ki mannyer i ete? Ki i pe fer pour nou? Ki i anvi nou fer?\*

Bondye pa ti anvi ki bann imen i zis travay, manze, zwe e fer en fanmir. Nou kapab konn nou

\* Vwar *Latour Veyer*, No. 1 2019.

---

## ATRAVER LABIB, BONDYE I ANSENNY OU “POUR OU PROP DIBYEN.”

—IZAI 48:17

---

# I POSIB POUR NOU ERE OZORDI

EN ZOUR personn pa pou malad, vye e mor. Ou osi ou kapab viv dan en lemond koumsa! Me ou pou dakor ki ozordi lavi i ranpli avek problem ek difikilte. Kwa ki kapab ed ou annan en pli bon lavi la konmela? Gidans sorti dan Labib i kapab ed ou annan en lavi ere. Annou vwar serten sa bann difikilte e ki mannyer Labib i kapab ed ou.

---

## KONTANT NOU AVEK SA KI NOU ANNAN

**Konsej Labib:** “Montre dan zot fason viv ki zot pa kontan larzan e kontant zot avek sa ki zot annan.”—**Ebre 13:5.**

Ozordi lemond pe bonbard nou avek bokou divertisman ki dapre zot i bann keksoz ki nou bezwen. Me Labib i dir nou ‘kontant nou avek sa ki nou annan.’ Ki mannyer nou kapab fer sa?

**Evite “kontan larzan.”** Dimoun ki “kontan larzan” i pa fer diferans ant sa ki byen ek sa ki mal, zot pare pou sakrifye zot lasante, zot fanmir, zot zanmi e zot dinyite. (1 Timote 6:10) Eski i vo lapenn sakrifye tousala? Non, parski a lafen di zour “larzan pa zanmen ase pour sa enn ki kontan larzan.”—Eklezyast 5:10.

**Dimoun i pli enportan ki keksoz materyel.** I vre ki serten keksoz materyel i vreman itil. Me sa bann keksoz pa kapab demontre lanmour oubyen lapresyasyon, zis imen ki kapab fer sa. “En vre zanmi” i kapab ede anmenn serten lazwa dan nou lavi.—Proverb 17:17, *NWT.*

---

## ANDIRE LER OU MALAD

**Konsej Labib:** “En leker zwaye i en bon [latizann].”—**Proverb 17:22.**

Parey en “bon latizann,” lazwa i kapab ed nou fer fas avek nou maladi. Me ki mannyer nou kapab zwaye ler nou pe soufer avek en maladi?

**Demontre lapresyasyon.** Si nou zis konsantre lo nou problem, “tou le zour” lavi pou paret difisil. (Proverb 15:15) O kontrer, Labib i dir: “Montre zot rekonesans.” (Kolosyen 3:15) Aprann pou apresye menm bann pti keksoz dan lavi. En zoli soley kose, en pti labriz, sourir en dimoun ki nou kontan, tousala i kapab amelyor nou lavi.

**Fer keksoz pour lezot.** Menm si nou lasante pa tro bon, “i annan plis lazwa pour donner ki pour resevwar.” (Akt 20:35) Ler lezot i remersye nou pour sa ki nou fer, nou santi nou ere e nou pa tro mazin nou problem. Nou kapab fer nou lavi vin pli meyer ler nou ed lezot annan en meyer lavi.



## NOU KAPAB ANNAN EN PLI BON LAVI LA KONMELA LER NOU SWIV KONSEY LABIB

### RANFORSI NOU MARYAZ

**Konsej Labib:** “Verifye sa ki pli enportan.”  
—Filipyen 1:10.

Bann koup ki pa pas bokou letan ansanm i riske gat zot relasyon. Alor bann msye ek bann madanm i devret vwar zot maryaz konman en keksoz *pli enportan* dan zot lavi.

**Fer keksoz ansanm.** Dan plas fer keksoz ki ou kontan ou tousel, akoz zot pa plàn pour fer keksoz ansanm? Labib i dir: “De i pli bon ki enn.” (Eklezyast 4:9) Zot kapab kwi manze, fer legzersis, pran en pti labwason oubyen fer en keksoz ki zot kontan ansanm.

**Montre ou konzwen ki ou kontan li.** Labib i ankouraz en msye ek en madanm pou kontan e annan respe pour kanmarad. (Efezyen 5:28, 33) En zoli sourir, en pti anmaye oubyen en pti kado i kapab ranforsi en maryaz. Byensir, bann konzwen pa devret annan dezir seksyel anver lezot dimoun apard ki kanmarad.—Ebre 13:4.

### “ALAFENDEFEN MON ANNAN EN BI DAN LAVI”

—Rakonte par Ryoko Miyamoto,  
Zapon.

Lavi ti difisil pour mwan. Mon msye ti bwar bokou e personn pa ti oule aksepte li pour travay. I pa ti anvi pran swen avek son fanmir. Menm si mon ti travay dir, sa pa ti ede pour amelyor sityasyon nou fanmir. Mon ti demann mon lekor ‘Eski sa ti mon desten oubyen i annan en keksoz ki mon’n fer dan en lot lavi e prezan mon pe ganny pini?’

Apre sa, en Temwen Zeova ti pas kot mwan. Avek en zoli sourir i ti koz avek lantouzyazm lo Rwayonm Bondye ek lavi eternel. I ti ofer mwan en Letid Labib. Deswit mon ti aprann ki Bondye i egziste, ki i saz, i zis e i kontan nou. Mon ti osi aprann ki arive avek nou ler nou mor e ki mon pa pe soufer akoz sa i mon desten.

Finalman mon ti realize ki sel fason pour annan vre satisfasyon dan lavi i ler ou annan en bon lanmitye avek Bondye. Ler monn konn bann laverite dan Labib, sa in donn mwan lankourazman, i’n fer mwan santi mon lib e santi mon byen. Alafendefen mon annan en bi dan lavi.

# KI LESPWAR I ANNAN POUR BANN MOR?

Lanmor i afekte nou tou me eski tou i fini  
avek lanmor? Eski bann mor in fini ganny  
oubliye? Eski i annan lespwar pour bann mor?

## ANNOU VWAR SA KI LABIB I DIR:

### BANN MOR PA POU GANNY OUBLIYE

“Tou bann ki dan latonm . . . pou resisite.”  
—Zan 5:28, 29.

Bondye i mazin bann ki’n mor, bann ki dan son  
memwar pou resisite.

### I POU ANNAN EN REZIREKSYON LO LATER


“Dimoun bon konman move pou resisite.”  
—Akt 24:15.

Plizyer bilyon dimoun pou ganny resisite avek  
lespwar pour viv pour touzour dan lape.

### NOU ANNAN REZON POUR KRWAR DAN REZIREKSYON

“[Bondye] i kont bann zetwal. I apel zot tou  
par zot non.”—Psonm 147:4, *NWT*.

Vi ki Bondye i kapab konn bann zetwal par zot non,  
i kapab fasilman mazin bann dimoun ki pou ganny  
resisite.



## SILVOUPLE ANVOY MWAN EN KOPI *Ki Labib i dir?*

Pour plis lenformasyon lo ki mannyer nou  
kapab vin pli pros avek Bondye, vwar  
sapit 1 dan sa liv pibliye par Temwen  
Zeova. I osi disponib lo [www.jw.org](http://www.jw.org)



LANGAZ \_\_\_\_\_


NON \_\_\_\_\_

LADRES EK TELEFONN \_\_\_\_\_

Pour ladres, vwar paz 2



 *Download* gratwitman  
sa magazin oubyen  
 bann kopi presedan

 Labib i disponib lo  
nou sit Internet dan  
plis ki 150 langaz

Al lo [www.jw.org](http://www.jw.org)  
ouswa  
skàn sa kod



wp.19.3-SC  
190513